

頤道堂文鈔

頤道堂文鈔卷五

錢塘 陳文述 退菴

先祖丹森府君行狀

會祖諱有道字仰渠

祖諱廷錫字君美

父諱禹治字公襄

府君姓陳氏諱光陸字丹森一字緒三先世自姚江遷杭世爲錢塘縣人會祖公襄公之季子也公襄公生三子長衛瞻公諱之淇次岱宗公諱之嶽三卽府君公襄公以上世有隱德以忠厚勤儉世其家府君之生也逮事二親及兩兄稱孝弟者無間言自壯及老交友以信待人以誠應

事接物酌乎情理而歸於寬和無妄言無畸行歷七十餘年如一日生於康熙辛卯六月二十一日乾隆丁未四月二十六日以老疾終於里第嘉慶二十四年歲己卯家大人年七十有二述亦生四十九年矣學爲韓柳歐蘇之文少有成就家大人命之曰爾祖之卒也於今三十有二年生平嘉言懿行不可屈指數嘗欲輯爲一編以示子孫以精神衰恭未克卒業今以語爾爾其識之宜撰爲行狀以待當世巨人長德爲銘幽之文述謹志之不敢忘家大人曰爾祖之少也讀書略觀大意不屑屑章句遇讜言名論輒循誦不去口及長以所業讓諸兄去而遊幕藉館穀以供菽水吳興族人養林公官揚州太守邀府君佐治金穀

敘宗盟之誼養林公性剛直以事挾齟商商怨媒孽於齟  
使以公事齟齬將罷太守官太守歎曰此事非佞訴大部  
不獲申也誰當往者府君慨然以身任之閱七晝夜至都  
會吏胥先受齟商金不直太守府君方在都念太夫人年  
高忽心動星夜出都比抵家太夫人已病重猶一見府君  
會伯祖岱宗公亦自近遊歸太夫人曰吾得見爾死不恨  
矣遂瞑人以爲孝感所致旣佐陝西布政使同里程公巖  
於秦中又佐公治皖會屬邑饑江北故有冒賑之習府君  
鈎稽精密藩司吏介司閹以數千金啖府君府君力却之  
曰饑民待此甚殷吾苟得此何異擠垂斃之民於溝壑也  
卒不受歲暮解館買舟歸見資送流民者兩邑互誘數百

人不得食將投水乃悉以館穀拯之不足則解衣以質歲  
暮抵家囊橐蕭然適次孫患痘已不治矣見府君張目而  
甦府君歎曰此或拯飢一念所致天道之勉人爲善如此  
耶卽養齋兄也其他所至之地一以公正爲主濟物利人  
之事知無不爲爲無不力春秋屆七十家大人請於府君  
勿復出遊始優遊里第晚得重膺之疾晨起焚香告天誦  
古聖賢格言數卷尤篤信陰騭文感應篇二書曰此三教  
會通之學俗儒妄肆詆譏不過自文其作奸犯科天道有  
知當不使此輩獲福也暇輒與家人說古今忠臣義士及  
生平經歷可驚可喜之事且曰吾生平不行一不義事不  
受一不義錢無酒過無色過似我者其在三郎乎三郎謂

家大人也性好善喜放生鄰有鬻朱魚者以食水蟲可憫  
勸改業售乾魚並依助之手錄格言數十冊並酌定祭田  
祠堂譜系規例謂諸孫曰陳氏居杭者不下數百家近支  
寥落鮮有達人蓋衰宗也吾齒已暮後嗣子孫有力者其  
勉承此志府君性好吟詠嘗有讀宋五子書古詩一篇深  
得宋儒精蘊其詩云一家各有一天地父子夫婦及兄弟  
朋友本自兄弟推君臣卽由父子例一身各有一天地耳  
目聰明心皆慧飲食作息有循環動靜語默無乖戾春夏  
秋冬天四季生老病死人一世元會運世遞相推皇極流  
傳有精義幾輩求佛與求仙幾輩爭名復爭利聖人之道  
曰中庸兩字精微更純粹莫見莫顯在慎獨不偏不倚在

立志何憂何懼在正心勿助勿忘在養氣五嶽鎮地川原  
分五緯經天日月麗三綱四德道並行萬歲千秋貞不敝  
道家釋氏書充棟頗有名言少真意禍福陰陽誤下愚邪  
說誠行極流弊萬物之體人所備天地之性人爲貴無益  
之書勿妄讀無益之物勿妄致無益之言勿妄發無益之  
心勿妄費事親從兄弟子職鑿井耕田皇古事道德仁義  
我自有富貴功名天所畀聖人明德在日新君子居易在  
素位我作此詩以自箴更爲世人警聾聵參同考異職歸  
墟何必仙家口訣佛家偈配張太孺人與府君龜勉同心  
有士君子之行先府君卒子二長諱鼎卽伯父位疑公先  
府君卒次卽家大人女一適姑丈王尊一孫七文清文溥

伯父位凝公出文浩文述文湛文鈞今名鴻慶七金家大人出曾孫六裴之文述出樹之文湛出彬之錦之熙之鴻慶出順之文溥出元孫孝先裴之出孝思樹之出

太子太保兵部尚書都察院左都御史兩廣總督年家世侍生儀徵阮元拜填

伯祖慕蘧公傳

慕蘧公名朝楨字思王曾祖仰渠公諱有道祖君甫公諱元錫父曰雍明公諱堯湘雍明公生三子長朝樞字良士次朝棟字文石公其季也乾隆初功令鹽務官許仕本省故公以錢塘人官鮑郎場州同知性伉爽負才略尤以敦本睦族爲務嘗慨古人族葬之制不可復宗支散處往往



墳墓不可考迺合祭之議春以二月冬以十月先期訂祭日晨集湖舫會於仁壽山祖塋仰渠公及子君甫君美公葬所也昭穆就列尊卑秩然拜獻以三母息毋傲禮成而退族中墳塋之近者次第畢往山僧邨媪咸知爲陳氏祭儀也先祖緒三府君因是有宗祠祭田之議先河之導自公發之公生於康熙甲寅卒於雍正癸丑配徐氏封安人合葬錢糧司嶺硃砂隴子嘯崖名邦煒又名邦燦字亮可嘯崖子四人曰孝基曰德基曰申基曰辰基申基字容舒始修族譜

從兄申基傳

申基字容舒嘯崖公第三子與弟辰基皆側室程孺人出

幼孤露刻苦自勵及長克自樹立以先祖緒三府君有手  
定族譜體例請任編纂且爲之序曰古之時列國卿大夫  
皆有宗支氏族以相次也三代以降仕不世祿然賢人君  
子猶能記其先緒聯其族姓以辨昭穆別親疏敦孝友譜  
之力也我陳氏自明季由姚江遷杭迄今百數十年始遷  
祖之名諱存歿年歲不可詳考豈非譜系之失傳已久歟  
族祖緒三公有志於此並欲建宗祠置祀產爲久遠計以  
繼於力其事未行然規制略定焉夫本大則末茂源遠則  
流長而日趨於疏遠者勢也今陳氏宗支幸未至於日疏  
不亟纂輯成書恐遂散佚是昭穆無由辨親疏無由別而  
孝友無由敦也乃徧告族人編纂考核摹東園公小源公

像於卷首泝本文所出也復爲表以志之考世系者一展卷而釐然具在孝弟之心有不油然而生者乎至於宗祠之建祀產之設是有望於後之有志與有力者以程孺人苦節撫孤成立請於族告祖廟正閭位焉辰基幼出嗣世父亦韓公旣亦韓公有子文漣乃歸亦能自立亦韓岱宗公子也名琪

從兄封光祿寺少卿文珊傳

文珊字用犀曾祖諱舜治字公伯祖諱之麟字甸侯父諱宜繩字克家世有隱德克家公以勤儉起家稱素封生四子君其長也補仁和學博士弟子有聲庠序間連不得志於有司乃兼習歧黃之術於陶貞白孫思邈張仲景以下

諸家之說皆有考究多所全活於宗族戚鄰間拯救尤多  
貧乏者加以軫卹性醇厚正直里閭鼠牙雀角之爭得君  
言若晨霜夜霰遇春風而自消也與弟文耀文光文潞相  
友愛同里宅者終其身 家大人於君爲尊行齒弱於君  
極重君君亦執猶子禮甚恭遇有族鄰之事必虛衷商榷  
無間言論者美之君長身玉立秀眉豐頤道氣盎然余幼  
年於諸昆中最喜君見君來輒就君問奇字又以君之精  
於醫也恒乞書方藥以爲娛君爲書曰敦孝友慎言語多  
讀書勤寫字勿嬉戲毋遊談葆精神惜物力此補神益智  
方也規誡之詞寓於諷誦崔子玉座右之銘勿過是已配  
唐氏繼配詹氏子三學訓唐氏出學瞻學誠詹氏出學誠

改名鴻生今名鴻嘉慶辛酉科舉人已巳科進士官翰林院編修兵科給事中今爲光祿寺少卿

從兄文海傳

文海初名文瀚字亦鷗又字友梅會祖諱舜治字公伯祖諱之麟字甸侯父諱宜中字允其杭州府學附生母鍾孺人允其公生三子長文濤字錦江次文灝字麗川君其季也幼嗜學刻意爲文應童子試久不售嘉慶戊午受知於學使阮雲臺先生補博士弟子卽於是年中本省舉人座主爲工部侍郎吳稷堂先生翰林院編修蔣丹林先生皆激賞君文屢試春官不得志鬱鬱以貧病卒卒之日母鍾孺人猶在堂兩兄皆困頓不自聊幾無以敘遺文零落更

無從收拾矣哀哉娶吳興葉氏無子女二人

仲弟壽蘇事略

仲弟壽蘇旣卒之十有八年爲今嘉慶二十四年其兄文述始得綜其遺行爲之事略曰余兄弟五人長曰文浩次曰文述卽余次壽蘇卽弟三日鴻慶四曰七金文浩七金早殤兩弟幼偕余出就外傅旣復從余讀書壽蘇性沉靜刻苦自勵讀書恒終夜不輟丹黃卷軸與燈檠茗盃雜陳一小几口誦筆抹不少休倦卽伏几上臥太夫人恒夜起止之逾數日輟又如故爲文有法度頗可觀覽年十八入邑庠爲博士弟子復與余以詩賦同受知於學使今兩廣總督儀徵阮雲臺先生旣刊所作於試牘中及來撫浙復

列姓字於詒經精舍題名之碑性嗜音律冥心坐索輒得  
神解應秋賦連不得志於有司鬱鬱致病久之遂成瘵疾  
鴻慶刲股和藥治之卒不瘳以嘉慶辛酉年八月十三日  
卒弟之卒也余方客京師爲位而哭之既歸哭於西湖之  
殯所丙子冬弟之婦方與子樹之相繼卒又哭於吳門次  
年丁丑夏孤孫長齡生樹之婦王氏遺腹也距弟之卒十  
有七年矣所著有青蘿館遺詩四卷樹之手錄予所編定  
弟名文湛字厚齋病中得古印有文曰壽蘇以自號也

亡姪樹之傳

樹之字仲華小字椿寧亡弟壽蘇之子生三歲而孤母方  
孺人撫之成立讀書爲文章頗有可觀性靜穆不妄言語

嘉慶丁丑十二月十九日以痛母疾作卒於苦次方樹之  
之疾也余適臥病不及爲視醫藥樹之瀕危屢詢余並爲  
書貽余曰兒不幸少失父賴母氏撫養得以成立今母因  
病死矣罔極恩深涓埃未報不可爲人不可爲子今兒病  
已深自知不起母苦節十七年尙未請旌賢孝之行伯  
父所悉望爲文以表彰之姪婦遺腹當孕一男一縷之寄  
在此孤寡幸善視焉 祖父母高年多病兒死而有知當  
默佑康健壽考是兒之代父母盡孝於祖庭也臨終神氣  
湛然年十九耳痛哉次年七月十九日遺腹子長齡生



伯考位疑公伯妣金孺人合葬墓誌

公諱鼎字位疑 祖考緒山公長子生於乾隆壬戌習舉業喜爲成宏正嘉之文小試不利遵例入國學就州同知職思入都應京兆試體素孱以攻苦患瘵疾卒年三十一乾隆壬辰二月二十四日也伯妣金孺人生於乾隆庚申卒於丁未子三長慶季清均早殤仲文溥卒於嘉慶庚辰卽養齋兄也女一適金靜波孫順之幼道光甲申文述等遵 先府君遺命奉兩柩附葬於 祖考新塋在 府君墓之昭位蓋 府君自傷手足無多元方早逝撫育遺孤俾之成立視兄子如己子視兄之孫亦如己孫慮後人之不克承與文述輩語及恒拳拳也以卑幼於尊長不敢銘

敬誌其歲月俾後嗣子孫力學勵行以竟先人未竟之緒  
並使我後人世世仰承先德克敦孝弟焉

皇清馳封修職郎 敕封文林郎晉封奉政大夫先考汾

川府君行狀

曾祖考 諱 廷錫

曾祖妣潘氏

祖考 諱 禹治

祖妣王氏

考 諱 光陸 馳贈文林郎晉贈奉政大夫

妣張氏 馳贈太孺人晉贈太宜人

府君姓陳氏初諱晉後改諱時字履中號汾川浙江杭州  
錢塘人曾祖祖父世有隱德以孝友寬厚世其家父緒山  
公幕遊數十載多濟人利物之行里鄙推重詳 不孝文述

所換行狀府君兄弟二人姊一人長位號公諱鼎次卽適  
王氏姑杭俗男女不異長故府君行三府君生而岐嶷妣  
張太宜人早逝先大父終歲慕遊兄位疑公多病養疾外  
家府君成童卽克自樹立不屑寄食族姓斷齏畫粥克苦  
自勵喜讀經世書爲文驚其老宿乾隆乙酉府君年十九  
查太宜人來歸辛卯以文受知於學使周海珊先生補錢  
塘博士弟子員戊子長子文浩生次年長女生皆早夭辛  
卯次子生卽不孝文述也甲午次女蘭素生適李氏以媿  
卒者也丙申第五子文湛生授室後卒者也戊戌第六子  
生卽不孝鴻慶也丁丑季子七金生以痘殤者也府君連  
應鄉試不得志於有司又以先大父年邁慕遊久無以爲

家思習他業以承色養曾任海濱魯村刺史效曾牧海昌  
延先大父治金穀聞府君名延佐書記見所治公積悉中  
肯綮又重府君孝友謂府君曰堂上年高幕廳勞苦子其  
代堂上爲鄙人治金穀館穀所入足供菽水俾堂上得所  
休息矣府君感其意盡心佐理先大父得優游里居者數  
年府君每一念及未嘗不感知己之誼數十年如一日也  
府君之在海昌也恭逢

高宗純皇帝

翠華六巡閱視海塘改建石二南北百餘里地皆在州境  
事屬刱建無舊章可循刺史一以委府君府君以事艱鉅  
辭不獲乃考訂古今志履地形勢估計工料雞鳴而起

秉燭治文書常至漏數下稟承於先大父以爲可然後刺  
史署諾行焉憶戊午春

文述

營疾兄然臨歸語不海昌寓

海神廟水星閣下嘗至海上西望錢塘東望龜赭石塘百  
里虹貫鱗巨浙西六郡數百萬戶田廬墳墓之保障於是  
乎在距府君治海塘日二十餘年矣間遇村耆寺衲營卒  
舊胥詢其顛末多能話府君軼事有感歎者夫以一書生  
爲人佐幕而所經畫垂久遠利害關數十郡邑功亦偉矣  
昔家天一先生佐河帥靳文襄公治河以布衣贈僉事道  
配食文襄祠府君治海塘功不在天一下徒以所佐僅刺  
史刺史終身未遷一階而況佐幕者然功在生民而不食  
其報則數十年來

不孝文述

等弟兄父子之稍克樹立者

無一非府君之慈蔭也歲丁未先大父寢疾府君親侍湯藥衣不解帶者數月先大父終以不愈府君柴毀骨立泣孺子泣慕孺子慕寢苦枕由不久內室庭有數桂樹每一號慟庭鳥聚而悲鳴哀感動行路焉嘉慶丙辰

仁宗睿皇帝登極改元

詔舉孝廉方正之士會

文述

以詩賦受知於學使今兩廣

總督宮保阮雲臺先生擬請於先生以府君應府君不許曰人之庸行何能克盡國之曠典豈可濫邀學使今大賢以國士目汝他人事尙不可妄干況已事乎卽他人舉吾亦不就也府君慕遊富春愛其山水遊平陽道經七里瀧謁巖子陵祠堂登謝皋羽西臺過石門觀瀑訪劉青田讀

書處借李游初郡伯昉戴雨村郡伯廷沐至湖州遊碧浪湖登道場山咸有題詠並佐戴公治杭州歲辛酉常公顯來治浙嵯今協揆英公煦齋前嵯使延公儉宜以府君薦常公延府君佐治浙嵯者三年館穀之外苞苴不入亦不爲谿刻之行嵯困以甦海昌南沙固臬藪聚無賴數千人販私爲肘腋患府君議官爲收買化私爲官化匪爲良境以安輯府君之幕遊也在海昌最久繼則任邱舒大令其紹延至長興數載會大令以命案呈吏議當戍伊犁囊空如洗眷屬不能歸相向而哭府君爲通盤籌策與後官析及錙銖並爲大令子具稟上官馳書僚友萃二萬金半歸其孥半畀大令攜至戍所其子以千金爲報堅拒不受江



西王大令汝盤宰富陽耳府君名敦請往富陽固衝途前任積虧七八萬金大令憂之將以身殉府君慰之曰勤可補拙儉可養廉君能惡衣菲食躬自刻苦期以五年補苴固易易也大令謹受教府君因爲次第經理七年大令乞病去廩藏充實尙餘三徑之資以娛老焉後之尹富陽者爲蜀人楊公鏐繼調溫州之平陽敦延府君偕往平陽濱海盜氛方熾沿海焚掠商民以爲苦府君至爲定方略編保甲練鄉勇設間諜杜內應於透漏水米之地偵察尤加密焉嘗一夕城中見火光燭天喧傳海口寇至闔城震驚府君燕坐一室遣人謂楊公曰毋張皇計海口至城數十里扼要處皆有偵察連日風信不順盜船不當至且以火

光方位度之亦非海口也漏四下營將沈廣馳馬來告曰  
非盜也乃村民失火耳人皆服府君之鎮定焉府君因募  
遊訂交者有張君穰槿君啟衡皆與府君甚相得韓君  
先卒張君爲福郡王上客屢薦府君自代府君辭之舅氏  
查公春山佐盛公柱樞粵海關嘗勸府君遊粵亦辭不往  
蓋以先大父在堂久已無遠遊之志矣游初李公攝寧波  
通判事延府君至鄞適家樹齋軍門大用開府海上與府  
君訂昆弟交古北口提督徐公銀時方官鄞亦有縞紵之  
契嗣軍門公罷官寓吳門可園府君就養至吳朝夕過從  
稱密邇焉府君館海昌日有錢賈誤寫會子得者居奇奸  
胥左之欲取贏焉恐以蜚語賈懼投牒他友皆議駁府君

曰若是則一家數命之案立見矣烏乎可判令准理賈錄  
判語焚香供奉終其身又里居日途拾錢肆會子亟覓其  
人還之友人王赤城歎曰晉公還帶千古傳爲美談君宅  
心如此後福未有艾也嘉慶丙寅文述以正黃旗教習期  
滿引

見奉

旨以知縣分發安徽會淮水盛漲洪湖漫溢南河決口兩  
江總督宮保尙書鐵公梅菴

欽使今相國戴公可亭河帥徐公心如因文述轉餉至清

江垂詢河務以文述少承庭訓會究心治水諸書檄畱南

河佐治宣防工竣敘勞次年丁卯奏奉

諭旨改官江南需次吳門乃迎府君至吳就養

文述既入

仕途奉儘先補用之

明詔者十六年而不得真除中間一攝寶山上海再攝奉賢崇明常熟府君或至或不至凡遇地方大事請命府君指示而後行在寶山請撤吳淞戍兵在奉賢浚河萬五千丈在常熟議海運事宜在崇明建沈忠節公祠一切章程皆府君所定也

不孝鴻慶

以主簿試吏吳門嘉慶壬申攝

丹徒主簿迎府君偕太宜人至署暇日登北固山攬江山形勝慨然興懷古之思

今上道光建元

文述

荷今協辦大學士兩江總督宮保孫

公河帥宮保黎公奏補江都縣二月視事四月迎府君偕

太宜人攜眷屬至安壚渡江闔家得團聚焉江都襟帶淮  
海南臨大江幅幘遠濶戶口殷繁又多梟徒出沒且爲九  
省水陸通渠漕艘餉鞘銅鉛木植篋纜之使終歲不絕冠  
蓋往來更無虛日俗又好訟積牘盈萬府君論不孝文述

曰此邦事繁汝其盡心民事晨昏定省不汝責也會遊初  
李公以金華太守乞養奉母僑寓廣陵李公故與府君訂  
昆弟交至是升堂拜母年節餽問堂上必親檢視以敦舊  
誼府君生平寡交遊至好惟同里金君貢九一人愛若手  
足金穀之學府君授之至是述延來署與府君昕夕聚首

府君之在吳門也婁東蕭君子山館余蘭臺聚齋八年爲

述子裴之

授經史府君重其文行極相得既錢君叔美來

館余桂葉書堂舒君鐵雲亦屢相過從鐵雲工詩叔美善畫博雅蘊藉府君咸樂與談讌終日不勅迨鐵雲子山先後逝叔美遠遊中州府君來揚州舍家人外無可談自金君來而府君心始愉快也廣陵佳麗甲天下芍藥尤有名每值花開率家人泛舸虹橋並登平山眺望以不孝文述幸無得罪於地方百姓也聽與人之頌而慰焉是年

詔舉孝廉方正山林隱逸之士故鄉親友書致述子裴之

請以府君應裴之以請府君笑曰吾嘉慶初己不應舉今

乃應乎孝廉方正可舉者如舒鐵雲蕭子山傅蘭齋惜皆故矣存者如金貢九林曙川姚春木江都之士則有若干萃文皆可無媿至山林隱逸必隱居求志遯世无悶者始

克當之故者如奚鍊生方蘭士彭甘亭張子貞存者則王  
椒畦鈕非石王柳村錢叔美庶其選耳吾已膺

國家封典居

堯舜之世敢以巢許自命乎堅命辭之不幸鴻慶自切悃

知醫理府君里居及在吳門醫藥調理之事一以任之及

文述

官江都迎養堂上鴻慶請假隨侍來揚文述以下情

陳於制府孫公乃檄調江北差委揚州府黃公松溪又爲

請畱揚州委用俾得近侍醫藥舉家感戴沒齒不忘嗣鴻慶

於高郵桃源歷獲疊劫巨盜蒙制府孫公中丞今漕帥

魏公專摺特保於道光二年冬入都十二月初十日奉吏

部帶領引

見奉

旨發往江蘇以縣丞用欽此懇親情切星夜南旋於除夕抵揚時都轉錢公恬齋方請於制府孫公鹺使曾公

奏挑儀徵全河以利商民並請檄下文述以江都知縣兼

攝淮南監掣同知事專治河復會同常鎮道王公簣山請於制府鹺使檄飭述子裴之以同知銜候選通判專駐儀

徵緝捕泉匪查辦棚場襄理儀河文案總催外江工程至是咸回揚署爲高堂奉屠蘇焉府君顧而樂之文述又以

本轄境內瓜洲大小江口渡江迂遠風不利輒覆舟乃請於制府孫公就舊有河形者浚之徑渡近約三里許避金山上下迴溜卽唐潤州刺史齊泚伊婁河故道也舊有石



橋捐廉重建俾通巨舫制府命鴻慶親駐工次經理其事

府君謂鴻慶曰此於南北行旅殊便用心治之我他日南

歸當道經此河也孰知河通橋成此途僅爲今日靈舫南  
還之地耶嗚呼痛哉今年夏江水盛漲兼以風潮久雨沿  
江圩岸破潰者甚多文述分遣鴻慶述子裴之率丁役賞

餅餌燭米四出撫卹府君曰水災與旱災異民居蕩析宜  
給蘆竹俾資棲處並以江船拯濟不然恐四面被水民無  
生路且吾嘗身經水災二旱災一災黎之苦蒿目傷心汝  
獨不憶乾隆丁未杭城米船不通汝母偕家人食薯紵衣  
度臘之時耶汝祖自幕遊以來在秦在楚在皖在浙辦災  
務十餘次吾亦經辦五六次如蠲賑緩征平糶招商截漕

通運以工代賑諸事舊章具在大約散粥不若散米散米不若散錢任胥吏不若任紳士請帑項不若勸捐輸前此大府辦災最善者莫若汝師阮宮保嘉慶九年歲甲子宮保撫浙浙東西水災公先奏撥藩司庫銀三十萬兩檄杭守李君坦赴蜀買米以李本蜀人也仍就被災地方城鄉遠近分設子廠散粥散米散錢悉延本地紳士經理之自乘二人肩輿從一騎一人荷茶具終日行村落中間民疾苦輿馬不通之處輒步行見者不知爲大府也厨傳不繼恒至廢餐不費州縣杯水全活百餘萬人是歲也饑而不害今江邑沿江百餘里悉被水災黎約數十萬人就通邑被災頃畝計之雖不及半而洲莊戶口已屬不少循例應

先詳請撫卹但現在戶口離散不能按籍勾稽若待查明請給輾轉需時遍地哀鴻實有迫不及待之勢是徒費

朝廷之帑項莫救蒼赤之流亡汝宜先行捐撫吾篋中尙存數百金當以助汝並宜勸諭鄉典收質農器禁止屠販私宰耕牛勸大業以讓麥租擇高阜以埋枯骨索鬼神以求廢祀施丹丸以防疾癘汪稼門制軍所著荒政輯要最爲賅備宜更擇要刊行之所慮者被水旣久秋稼未收補種無期民力實爲拮据縱沐

皇仁下逮散給口糧屈計必在孟冬以後匝月之

恩膏恐不足以濟殘年之凍餒揚城樂善尙義之人應復不少爾宜首先倡捐廣爲勸諭以爾平日居官尙能取信

於父兄耆老定有關念桑梓踴躍捐輸者俟其捐有成數於冬令散賑之後或採買米穀減價平糶或按照煙戶發給口糧或施衣禦寒或設廠煮粥隨時察看情形次第實心經理之明春如再能展請口糧俾資接濟待至新麥登場江民其庶有豸乎此外如洲田圩岸被水衝破固由江海驟漲究因隄防卑薄所致夫非常之原黎民所懼被災之後咸有戒心宜乘冬令水涸勸諭大業增培高厚所用夫土工費照業食佃力之例分段自行經理力量不及者並諭有力者捐墊修之墊者工竣爲清理歸款捐者詳請獎勵漕田民堰亦可一律辦理俾就近貧佃災黎旣得以稍資口食能如范文正公所築西溪海塘禦災捍患一勞

永逸尤數十世之利也東鄉有鄰邑飛蝗過境

不孝文述

督飭撲滅淨盡府君曰蝗害最酷吏議綦嚴停落生蝻一

生九十九子卽螽斯也十八日而翼足全遂飛騰矣所過

之處雖不爲災宜令刈割翻犁以淨遺孽所刈稻梁宜按

畝償值以示體卹沿江被水之區秋後水落宜將淹浸蘆

葦芟蕪務盡以免魚蝦遺子化成蝗蝻致滋後患並論文

述曰海潮入秋日盛一日每月初三十八兩天汛宜分遣

防護過八月十八潮始平耳蓋杭俗以是日爲潮生日也

豈知甫屆八月而府君已弃

不孝

等而長逝耶嗚呼痛哉

述子裴之於嘉慶壬申受知邑侯張公德標太守嚴公榮

學使周公兆基補博士弟子員後秋試屢薦不售府君論

曰士君子讀書明理貴爲經世有用之學青瑣是吾家故  
物汝率爾操觚而親友老輩如梁山舟馬秋藥錢次軒石  
琢堂阮雲臺秦小峴戴金谿許周生潘榕皋雲浦芝軒唐  
陶山汪劔潭韓聽秋桂船萬廉山咸有國士之目海內名  
流如王惕甫舒鐵雲彭甘亭姚春木吳蘭雪查梅史王仲  
瞿孫子瀟郭頻迦亦皆品題激賞以爲克紹家學宜更砥  
礪名行無負知己科名得失非所計也道光二年淮徐道  
吳公省菴奉制府孫公檄飭欽遵嘉慶十五年

諭旨查辦宿遷駱馬湖灘地水道一案知

裴之

夙稟祖庭

之訓羸知勾稽案牘請於制府孫公命佐幕府治文書並  
飭緝獲淮北巨梟都轉錢公聞而嘉之請於孫公命密獲

儀徵梟匪是年冬遂又有儀徵催工查捆之役儀徵爲淮  
鹽淵藪歲捆掣以百萬計賴以養生者數十萬人是冬因  
須疏濬全河分築大壩冬令水涸鹽艘咸泊壩外不能抵  
洲捆掣府君謂裴之曰吾聞儀民恃鹽爲業今己失業旬  
月風雪周年饑寒交迫聚爲剽掠散則流離且江廣口岸  
雖年來官引滯銷然必待儀河挑竣再行捆掣停運至數  
月之久岸儲不繼數省淡食必有起而議其後者錢公與  
曾公皆於汝有知己之感今以鉅任委汝宜悉心籌之裴  
之奉檄赴儀恪遵指授相度機宜創爲移捆之議並條具  
章程以上嵯使喜謂都轉曰開河轉運兩不相妨今而後  
余始得安枕矣或謂非商民所願有於嵯使前沮之者嵯

使曰陳倅實心爲民是其家學決無僨事之慮聽之可也

言者慙沮而退季冬二十一日

裴之

於黃連港築場旣成

督商移捆羣情歡抃邦之賢士大夫且有作爲詩歌以詠之者今年四月朔河工告成始復洲捆舊制二月初旬楚督李公已馳書驪使催運甚迫計自黃連港移設捆場以後共捆鹽三十餘萬引旣裕

國課復奠民生人於是歎府君先幾之訓爲不可及也

文

述

奉總理儀河之檄稟請督辦工程不經手錢糧

鴻臚奉

督辦瓜洲之檄嚴禁需索

裴之

奉總催儀河之檄躬自刻

勵不費各工一草一木並請於都轉錢公觀察王公出示  
工次府君聞而喜曰吾生平非分之財一介不取利人之



事見義必爲爾等皆能體吾之心爲心吾無憂矣先是嘉

慶十八年

鴻慶

需次省垣適今宮保熱河都統慶公葆園

開藩江省於

文述鴻慶

弟兄父子恩誼有加又以司庫帑

藏歲出納以百萬計慮典守之難其人也專檄

鴻慶

監視

庫務府君諭之曰脂膏之地人所必爭逾格之施尤易招

忌慶公察汝謹慎故以重任畀汝宜益加廉謹以副委任

鴻慶

誌之不忘上年冬慶公以浙閩總督

內召還朝道經江邑

文述

等迎謁舟次蒙絮問堂上起居

安否日下書來亦嘗垂詢及之嗚呼豈知府君已弃

不孝

等而長逝耶府君今夏聞

鴻慶

當得吳縣丞官舍在靈巖

山下喜曰吾客吳久未至鄧尉梅花開日當泛一舸探香

雪海耳五月初旬制府孫公念裴之之歷著微勞也會同  
河帥宮保黎公中丞韓公奏請畱江差委五月二十五日  
奉

旨以查辦駱馬湖灘地辦理尙爲安速拏獲在逃梟棍更  
屬緝捕勤能准其畱於江南地方以通判差委欽此府君  
心喜繼起有人論裴之曰我陳氏以忠厚傳家恥爲矜囂  
浮薄之行故汝父服官以來每遇拂逆之境惟有修己俟  
命任天而動卒之化險爲夷亦無甚不得意之事夫一命  
之士果能存心利物於世必有所濟汝今幸列宦途就平  
日居心接物而論吾不患汝不實心奉公特患汝懷才太  
露耳知白守黑慮以下人處世之方卽服官之要也汝其

誌之又曰吾家四代同堂今汝父子叔姪又得同官同省  
就近養親天之施予不爲不厚所悲者先代多係單傳人  
丁本少汝自胞弟阿荀歿後觀與從弟樹之等親愛有加  
余心甚慰丁丑之疫諸雛同夭今長支僅遺汝一人汝叔  
自汝叔母與子彬之錦之故後并鄒姬所生熙之亦以病  
殤繞膝無人傷心弔影本擬爲之續娶因汝叔母素性淑  
順竊恐難以爲繼汝叔義不更娶吾是以商於族衆嗣汝  
族伯錦江之子輔之以爲後畀程姬撫之以慰目前今幸  
鄒姬又生子兆栢迺告諸族黨卽以鄒姬爲繼室主持中  
饋俾紓內顧之憂李姬生子兆松與輔之爲伯仲焉至汝  
五叔一支僅存遺孤孝思門祚薄弱言之痛心汝婦汪氏

自生孝先以後因禱汝父母之疾長齋繡佛者三年羸弱  
多病汝妾王氏情性婉淑余甚喜之特恐孫曾林立在于  
身後余不及見爲可憾耳嗚呼此今年夏初府君屢爲家  
人言之者不虞竟爲長逝之讖也痛哉痛哉

裴之得

旨俞允例當晉省應官因府君方病不忍遽離府君諭之  
曰吾家再世受制府河帥厚恩宜速往謁謝況現在通省  
被災需員勘撫當大賢焦勞民事之秋正屬吏奮効馳驅  
之候汝當以民事爲重母以我爲念也嗣制府孫公知府  
君寢疾於七月十三日准飭

裴之

暫緩赴蘇先歸省視

裴

之  
星夜回揚隨同

不孝文述鴻慶

侍奉湯藥府君猶於牀

第間手撫

裴之

詢問水災近事並感誦孫公恩誼不置執

知半月以後之終於不起也府君病中不孝鴻慶因吳縣

前丞未奉擢任是以不果攝官

裴之

又爲吏部議駁府君

病已深家人戒不以聞乃知

不孝

等平日所藉皆府君之

蔭府君將不諱而後人功名之途亦皆得而復失蓋如此其驗也府君中年以後傷於哀樂一則位疑公女適金氏從姊早卒府君所撫育遣嫁者也一則位疑公子從兄文溥歿於吳寓府君所自幼教誨授室以至成人客閩不得歸族兄默齋方官閩參將寄貲貽書覓之歸者也一則適李氏妹蘭素最所鍾愛以婉後亡一則仲弟文湛早逝婦方撫孤守節二十餘年丁丑病故孤子樹之殉母於苦次

不孝鴻慶

婦胡子彬之錦之熙之女三人及恩撫子厚之

鴻慶妻母

詔旌貞孝胡母吳孺人先後歿於寶蘇局署此皆數句中事諸雛哀兄戀母骨日枕藉最爲慘目傷心者也府君生平金穀之學得先大父親授自始徹終有條不紊慕遊浙東西四十餘年有延訪而無請謁親承府君指授者金君貢九外惟從孫學瞻爲最學瞻爲從兄用犀次子用犀名文珊醇篤俊偉君子人也輩行於府君爲從子年長於府君而最服膺府君於同族中亦最相契文珊以學瞻託府君府君盡心誨之學瞻弟學誠亦欲從遊府君謂文珊曰此讀書種子也宜俾卒業可冀大成吾宗衰當賴以昌學誠後改名鴻卽今光祿寺少卿雲南學政也最敬事

府君滇雲萬里郵書來往無虛月府君不諱前數日猶自滇寄書問起居府君平日服履江南苦無佳者學瞻能識之每爲郵致臨終所服卽近日自杭寄者李氏妹婿秋厓少與

文述

同筆研旣託姻婭敬事堂上若所生蘭素妹故

後情誼尤加摯焉府君於故鄉之事一以委之皆能先意承志月郵致書數次瑣屑情話藉慰老懷捐館前數日適寄湖縣數十束來因卽用以爲殮訃至之日皆不知若何哀悼也嗚呼痛哉府君於族人用犀外相得者有容舒麗天弟兄容舒勗議修族譜府君代爲製序並於吳門刊之謂

文述

曰他日宦成倘得餘貲卽不能如汝師阮宮保之

建家廟亦當建宗祠於西湖聯族姓春秋祭掃當復族祭

之儀汝祖手定規條均宜遵而行之族人同此志者容舒  
麗天兄弟其人也容舒名申基麗天名辰基於府君爲從  
子麗天幼嗣二房朝夕依府君故府君尤憐愛之從子文  
漣早卒世父岱宗公從兄亦韓兩世未葬府君命文述爲

營葬於青芝塢文漣孤子均之並命招歸撫之壯爲授室  
文溥婦戴氏孤子順之府君憐其孤寡軫恤逾於所生遠  
族若石琴孝廉雲柯京卿荔峰閣學曼生司馬仲恬孝廉  
慎修茂才芝楣通守與文述爲兄弟行皆敬事府君府君

亦皆親禮之於曼生尤密以在浙在京師在南河在江南  
皆與文述齊名或稱二陳或稱曼雲也親串最相得者舅

氏查公春山

文述

之外舅龔公快哉婦兄龔素山龔懶仙



文淵

之外舅方公雲麓均之之外舅余西閣文溥之壻孫  
秋巖彌甥王雲莊去年麗天曼生先後卒今年仲恬秋巖  
又相繼歿府君皆哭之甚哀話及親族凋零居恒悒悒不  
樂府君精禪理嘗語人曰佛家之無我相卽聖人之毋我  
毋我工夫必自克已始吾一生無他進境惟以克已自勉  
耳屬曼生刻一生克已小印以自鑑焉天性澹泊屏絕嗜  
好嘗自題楹帖曰一椽容我老終日看人忙寂居斗室不  
事行藥生平善奕在吳門寓中所朝夕對局者李平泉暨  
舒鐵雲子孟舉自來邗上以官舍湫隘玉樹堂中間一對  
枰視庭槐移影輒止精神亦少恭矣素工書法在襄陽東  
坡間几席之銘多自書不倩他人亦不爲他人書也間飭

錫工精製茗壺茗舫自爲銘詞命裴之或徐仲文書之或

命

鴻慶

寫梅竹於上屬幕中王仲瞿子雲潭朱貞士劉仁

山分刊之香溫茶熟聊以自娛而已嘗見

女述

父子交遊

廣用不節誨之曰吾生平一介不取而未嘗不與爾等遇  
疾病饑寒及婚嫁喪葬貧乏無力者竭力助之良是非是  
者何能徧給待人接物期於問心無媿即可焚香告天矣  
不虞之毀譽聽之可也府君性直諒遇事不可輒侃侃無  
所回護事過輒忘不念舊惡凡見急難之事調卹無所吝  
以是人皆敬而懷之易簣之夕幕中友親金貢九龔懶仙  
王雲莊諸人相持慟哭皆失聲非府君平日之誼敦古處  
有以致之哉昔先大父生平無酒過無色過不行一不義

事不名一不義錢嘗謂人曰似我者其在三郎謂府君也  
府君平日不持齋而自奉甚簡從不食特殺逢先大父母  
誕日及忌辰輒買禽鳥水族放之闔家戒食牛犬皆遵先  
大父遺訓也在吳與董小亭封君最稱莫逆憫牛有功於  
農田齒老不任耕作輒付屠門實傷天和因與勸養性局  
於胥門外之棗墅橋集衆捐貲收買飼之死則瘞焉並與  
家人每月各捐貲爲放生小會買羅雀網鱗螺蚌之屬放  
之歲以萬計山塘清節堂者羣婺守貞之所也棲食之費  
韓旭亭封君主其事府君實左右之司事者奉韓封君與  
府君長生粟主於堂之西舍焚香祝延以志恩蔭府君幼  
失恃終身悲慕不衰涓陽之情久而彌摯幕遊不越浙省

以先大父在堂歲時必歸里省視外大父查公情田晚年亦自幕府倦遊旋里親申中最愛重府君吳山探桂西泠觀荷笠屐之遊頻換杖履

不孝文述

遊京師先假館情田

公族人查懌餘比部宅中

文述

庚申同年又山侍御之尊

人也嗣爲孫古雲襲伯招居太平湖上邸第者二年襲伯與查氏姻婭爲相國文靖公之長孫與

文述

訂昆弟交文

靖公墓在西湖天馬山府君春秋上冢之便必過視之爲

禁樵採焉府君與太宜人同庚生先後相距二日府君生

平不許因壽稱觴致煖物命家人輩焚香供花者亦禁絕

之於太宜人誕辰則聽之今年七月將屆期因洲民被水

呼不孝文述

名謂太宜人曰渠爲地方官一邑猶一家也

豈有子弟寢疾而爲父兄者謹樂耶蓋不知太宜人已諭

文述

等謝客不許稱觴猶爲隱語以相諷諭也乃甫及兩

旬而遽捐館舍矣嗚呼痛哉府君精音律在海昌日

高宗純皇帝南巡供奉樂章多經府君點定舒鐵雲撰琵琶賺人面桃花玉鑑三澗雪諸樂府王仲瞿謨衆香園院本咸請正拍於府君吳門周采巖爲寫花影吹笙圖楊蓉裳題疏影詞周雲巖爲寫雙鬟擷笛圖吳山尊題青玉案詞比之白石老仙小紅低唱焉並以先大父有帶月荷鋤小影又屬王椒畦改七薌沈春蘿作東皋耦耕圖以寄歸思田君禹門善鼓琴山巔水涯燕初鷺晚輒作數弄清韻泠然府君恒贊歎之旣所以撫古琴名響泉者贈府君府

君至吳畱蘭素妹家遭回祿燬焉每一憶及未嘗不歎人  
琴之俱亡也性耽吟詠惟不多作嘗有出門口號云征夫  
愁遠行妻孥反色喜不是輕別離祇爲厨無米舒鐵雲歎  
爲真摯獨絕又在吳門與蕭君子山倡和句云戶外履聲  
兒輩客眼前秋色異鄉花府君生長湖山故里墳廬舊遊  
親族未嘗一日去懷徒以不孝等羈宦清貧往返多費瀕  
行輒止嘗謂不孝等曰江南風土洵美故鄉亦不惡俟爾  
等稍能自立終當一舸歸耳吳君隱生者府君譚道之友  
也營幽居於西湖之理安山迴象峰下近九溪十八澗巖  
壑幽峭林木深邃爲湖山佳處府君思營數椽爲他日入  
山譚道之地命裴之謹誌之嗚呼孰知此願之終不可償

耶舊著最樂編注釋種藥齋詩集法祭酒梧門詩話云雲  
伯嘗呈其尊甫汾川先生種藥齋詩氣息靜穆似學道人  
語幽居數章尤佳如綠借鄰家樹紅分小圃花松花糝棋  
局竹露滴琴牀草堂邀乳燕竹徑待流鶯漁竿臨水儘酒  
幔隔花樓野人譚稗史稚子課農書質樸中具有悠然出  
塵之致觀此可知府君詩學之深矣 不孝文述 所著晉書

注頤道堂詩文集秣陵集

不孝鴻慶

孫真人海上方箋釋

多呈府君閱定

裴之

澄懷堂詩西北水利諸議

裴之婦汪

端

自然好學齋詩及所選明三十家詩

文湛

青蘿館遺詩

文述妾管筠

小鷗波館詩府君皆嘗閱之曰爾等表章貞

烈激揚忠孝或爲經世濟人之書立言未嘗不佳特慮一

家之中發洩過盛耳

不孝鴻慶

喜弄筆墨初從族兄曼生

學篆隸鑄圖章並畫蘭竹師陳白陽既從錢君叔美學畫

山水師文五峰府君深喜閱之歲輒命繪團扇摺扇數事

謂之曰筆墨精良儘多佳趣何必奇鷹劣馬乎以

鴻慶

幼

好控劣射生迄今猶見獵心喜府君寓嚴訓於諧譚之次

意深而語婉迄今思之真不知涕之何從也又見

不孝文

述

平日愛誦陶淵明歸去來辭並見所爲畫屏懷古詩多

樵寫古今石隱者流知其志就泉石而不得遂也嘗慰之

曰爾竭冠受知淮南之門期以館閣大用乃潦到名場宦

海者垂三十年一官奔走不得休息宜汝之鬱鬱也然儒

者之入官如佛家之住世自有一定之期且故鄉無寸土



可畊老屋數椽不蔽風雨公私累鉅將安所息肩乎況如  
汝友蕭子山舒鐵雲彭甘亭王仲瞿樂蓮裳李繡子諸人  
懷才抱學而處境猶不汝若也今汝有親有弟有妻有妾  
有子有孫有詩文集且薄有政聲東坡定風波詞曰此心  
安處卽家鄉何必漱石枕流乃謂之隱耶汝師阮宮保詩  
集中有一日之隱數章甚有精理宜熟玩之青山在望白  
首可期與稚川君復爲侶亦易易耳嗚呼音容已渺慈訓  
猶存孰知不孝息肩之日乃在府君弃養之日也痛哉痛  
哉近年官吾杭與府君相契者自阮師宮保外今兩浙都  
轉宋公仁圃今兩淮都轉張公雲巢今浙江廉訪吳公荷  
屋前餘杭令張公蒔塘廉訪與文述爲同歲生先於丁卯

秋奉

命典試吾浙撤棘後謁府君於里第上年陳臬八閩道出  
邗江登堂請見府君宋公自松郡擢任後往來邗江亦必  
詢府君近狀張公蒔塘與不孝文述稱兄弟行府君就養

吳門頻相過從張公雲巢前年以浙江糧儲道督運過揚  
猶與府君相見府君論逆子裴之曰張公與而父京華舊

識治吾邑多善政故其舊日所貽書扇余至今猶珍藏之  
以奉湯君子之風耳今年來治淮嵯府君因患目疾已不  
獲相見府君病都轉來視疾府君旣捐館舍都轉來視舍  
殮不孝等於苦次相持哭失聲嗚呼此固都轉之篤於  
舊誼靡間存沒而府君善與之交之槩亦於此可見矣府

君長身玉立豐頤廣額美鬚髯望而知爲巨人長德體素強健行不持杖終日清譚不倦聲徹數間屋尤喜諧譚遇可笑事輒作偶語聞者拊掌眉長寸許壽癡著頰如痘近年得怔忡之症每發輒須依人閉目靜坐少服葠劑乃止今年四月患目疾繼患耳閉繼患呃逆繼而肌肉漸瘦至七月間神氣委頓閉目不語亦不飲食投以補劑而委頓益甚至七月三十日夜半脈象忽大變侍進葠藥百計罔效延至八月初一日卯刻竟棄不孝等而長逝矣嗚呼痛哉不孝等從此終身遂爲無父之人矣罪孽深重侍疾無狀悠悠蒼昊哀籲莫及嗚呼如不孝等尙得謂之人子哉嗚呼痛哉痛哉府君歿於道光三年八月初一日距生於

乾隆十三年七月初十日享年七十有六府君配查太宜人國學生 敕授文林郎候選知縣諱昌泰字情田公長

女候選州判諱桐乾隆庚子科副榜甲寅 恩科舉人德

清縣教諭候選知縣春山公名柵國學生諱榛名櫛公胞

姊長蘆鹽運司知事名世勲胞姑妾舒氏子五人長文浩

早卒次不孝文述 錢塘學咨部優行廩生嘉慶戊午科副

榜庚申 恩科舉人充正黃旗官學教習分發安徽候補

縣 奏畱江蘇補用 奏補揚州府江都縣知縣歷署上

海崇明常熟寶山奉賢縣事兼署淮南監掣同知娶龔氏

乾隆丙戌科進士山西壽陽縣知縣諱導江字岷山公孫

女國學生名樂字快哉公長女仁和縣庠生候選布政司

理問名凝祚胞妹國學生名本泉名凝度胞姊妾管氏次

文湛

錢塘縣庠生先府君卒娶方氏湖北漢川縣分縣名

文公次女嘉慶丁卯科舉人卽選知縣名懋嗣仁和縣優  
貢生道光辛巳 恩科舉人名懋朝公胞姊次 不孝鴻慶

江蘇候補縣丞前署元和丹徒縣主簿歷管撫院巡捕協  
理寶蘇局事娶胡氏國學生諱應培公女繼鄒氏妾程氏

李氏次 七金

幼殤女二長早卒次適候補布政司理問李

名鳳翮孫九人長 裴之

錢塘縣庠生同知銜通判娶汪氏

乾隆乙丑科進士刑部員外郎諱憲字千波公孫女候選  
布政司經歷諱瑜字天潛公次女仁和縣庠生四川候補  
縣丞諱初國學生諱潭胞妹妾王氏次孫 學荷 早卒皆不

孝文述

出次 樹之

候選翰林院待詔早卒

文述

出娶王氏

嘉慶甲子科舉人諱仁公女杭州府學廩生名積誠嘉慶

丙子科舉人名積順胞妹次

彬之錦之熙之

皆早卒次 輔

之以族孫嗣

不孝鴻慶

後次

兆柏兆松

皆 不孝鴻慶

出孫

女八

不孝文述

出者三長

華

適

候選布政司理問葉名

楠公季子吳縣學廩生廷瑄次

麗

適江蘇布政司理問

許諱立昌公子候選府經歷震宗次

慧

早卒

不孝鴻慶

出者五長

安

許字太常寺少卿原任河南巡撫姚名祖

同公孫署江蘇荆溪縣知縣嘉定縣丞名大成公子建斗

未嫁卒次

瑞 媛 愛 媛 德 媛

皆未字早卒次

定 媛

幼曾孫三

裴之

出者二長

孝如

早卒次

孝先

幼

樹之

出者一

孝思

幼

嗚呼府君竟棄

不孝

等而長逝耶椎心泣血萬死莫贖徒

以太宜人在堂苟息苦幽謹就記憶所及詮次崖略以俟

當代立言之君子哀賜采擇

不孝

等世世子孫感且不朽

儀徵阮元填諱